

Tau e kopana le thaka ya yona

E phetwa hape ke Hilda Mohale
Ditshwantsho ka Alzette Prins

“Ha re tsome mmoho!” ha rialo Tau ho Phokojwe e Nyane. “Ha re ka tshwara letsa le lenyane, e tla ba la hao, empa ha re ka tshwara le leholo, ke la ka.”

“Ho lokile!” ha rialo Phokojwe e Nyane.

Ha etsahala he hore phoofolo ya pele eo ba e bolayang e be phofu e kgolo. Tau e ne e thabile. “Ke tla tswela pele ho tsoma,” a rialo. “Tsa mo bitsa bana ba ka ba tlo lata nama ena ba e ise ha ka.”



“Ho lokile!” ha rialo Phokojwe e Nyane hape, empa yare feela ha Tau a qeta ho tsamaya, a tsamaya a ya lata bana bao e leng ba hae, e seng ba Tau. “Tau o nahana hore ke sephoqo!” Phokojwe e Nyane a tsheha. “Hobaneng ha ke tlameha ho fepa bana ba hae empa ba ka ba lapile?”

Tau a se ke a hlola a bolaya letho. Ka mora dihora tse mmalwa, a fihla lapeng la hae, a kgathetse a lapile. “Nama e kae?” a botsa Tauhadi, a inyeka thekeng.

“Nama efe?” ha araba mosadi ka monyemo.

Tau o ne a halefile. “Phokojwe e Nyane ha a ya tsebisa bana ba ka hore ba yo lata nama?” a puruma.

“Tjhe,” ha rialo Tauhadi, “ha a ka a ba lata! Re ntse re lapile!”



Ka ho kgena, Tau a tswa a potlakile ho ya tlung ya Phokojwe e Nyane, empa diphokojwe di ne di dula hodima lefika le phahameng, mme tsela ya ho fihla hodimo moo e ne e le ka thapo feela.


“Hela, Phokojwe e Nyane!” ha puruma Tau. “Ke batla ho bua le wena!”

“Lebitso la hao o mang?” ha hoeletsa Phokojwe e Nyane.
“O mora mang? O tswa kae? O ya kae? O batla mang?
O mmatelelang?”

Tau a utlwa a ferekane, empa a araba, “Ke tlo bona wena. Theolela thapo kwan!”

“Ho lokile!” ha hoeletsa Phokojwe e Nyane.
“Ke eo he!” Empa thapo eo a neng a e theola e ne e entswe ka letlalo la ditweba, mme ha Tau a sa ntsane a nyoloha ka yona, ya kgaoha. *Ratla!* Tau a wela fatshe. A kgukgona a tsamaya a kgenne, ha Phokojwe e Nyane yona e shwele ka ditsheho.

Ka lehlohonolo Tau e ne e le phoofolo e nang le mamello. “Bohle re hloka ho nwa,” a rialo ka monyebe, mme a tsamaya a theohela ka nokeng ho ya emela Phokojwe e Nyane. Empa eitse ha phokojwe e maqiti a fihla lebopong, a bona Tau mme a baleha hanghang. Tau ya mo lelekisa, empa Phokojwe e Nyane a nyamela ka hara mokoti o tlasa sefate. Tau a leka ho nanabela ka leoto la hae la ka pele le holo. O hlotswe! A kgona feela ho tshwara mohatla wa phokojwe.



“Tau, Tau,” ha hoeletsa Phokojwe e Nyane, “ha se mohatla wa ka ono, ke motso wa sefate! Leka ho o otlala ka lejwe, mme o tlo bone hore na madi a tla tswa na!”

Yaba Tau o tlohela mohatla, mme a tsamaya ho ya batla lejwe. Hanghang Phokojwe e Nyane a itshunya ka hara mokoti, a ba a hula mohatla wa hae. Ha Tau a kgutla mme a bona mohatla o le siyo, a ipata ka mora lefika mme a ema moo.



Dihora tse mmalwa tsa feta pele Phokojwe e Nyane a nyarela ka tlhokomelo a le mokoting. A se ke a bona Tau, empa a nahana hore mohlomong o haufi kaekae. Ho etsa bonnete, a hoeletsa, “Ho, ke a o bona, monga ka, le ha o ipatile!”

Tau a se ke a re letho. A tiisa mmele wa hae, a ikemiseditse ho tlola. Empa Phokojwe e Nyane a monyoha ka mokoting ka ho panya ha leihlo hoo Tau a ileng a sala moo. Phokojwe ena e maqiti e ne e phonyohile hape!

Ho ile ha feta dibeke, empa Tau o ne a sa tswafe ho ema. Ka tsatsi le leng, a kgona ho kwalla Phokojwe e Nyane mopatisaneng o pakeng tsa mafika a mabedi. E ne e le moo a reng o tla tlola, ha Phokojwe e Nyane a hweshetsa, “Kgutsa! Ha o bone tshepe ela e mola? Ke thabile ha e le mona o tlile ho tla nthusa! Dula mona mme nna ke tla pota lefika ka mona ebe ke e kgannela ka ho wena.”

Ao Tau wa batho! A ema moo eka o tshwarehile – mme Phokojwe e Nyane a baleha hape.

Beke e nngwe ya feta. Phokojwe e Nyane o ne a tseba hore Tau o tlo kopana le diphoofolo tsohle tse nang le manaka. “Ke nahana hore ke tla ya kopanong eno!” ha rialo Phokojwe e Nyane. “Ekare nka iketsetsa monatenyana!”

Yaba Phokojwe e Nyane o utswa mafura moo ho dulang dinotshi teng, mme a iketsetsa manaka a matle a mabedi. “Ka tla ka ikgakanya hantle bo!” a rialo a bososela ha a fihla kopanong. “Ha ho motho ya tla ntseba!”

Empa Phokojwe e Nyane a etsa phoso e le nngwe feela – a dula haufi le mollo. Yaba o dula a iketlile ha monate hoo a ileng a kgaleha. E se kgale manaka a hae a leshano a thapa a eba bonolo. Qetellong a qhibidiha mme a rothela fatshe a fetoha letangwana la mafura.

“Shebang!” ha hoeletsa Nare hanghang. “Ke Phokojwe e Nyane!”

“Mo tshwareng!” ha puruma Tau, empa lerata leo la tsosa Phokojwe e Nyane mme a phakisa a ipata ka tlasa lefika le neng le le moo. “Thusang!” a hoeletsa. “Lefika lena le a nkwela!”

“Ke wa ka jwale!” Tau a tsheha, a phahamisa palo e tlang ho tshehetsa lefika leo hore a tle a kgone ho tshwara Phokojwe e Nyane. Ao banna! Ha a hetla, Phokojwe e Nyane o ne a balehile hape, a ntse a mo tsheha. O ne a boetse a qhekanyeditse Tau hape!

